

Sillimmasisarfimmik, assigisaannillu aningaasaateqarfimmik, kalaallinik tamakkiisumik amerlanerussuteqartunilluunniit pigineqartussamik pilersitsinissamut periarfissanik misussuisoqarnissaanut, Kalaallit Nunaata iluani aningaasaliinerulernissaq siunertaralugu, Naalakkersuisut peqquneqarnissaannut Inatsisartut aalajangiiffigisassaattut siunnersuut. Misissuineq Inatsisartunut ukioq 2025 aallartinnerani agguanneqassaaq pillugu oqaluuserisassaq 101-imut akissutitut allakkiaq.

(Inatsisartuni ilaasortaq Jens Napaattooq, Naleraq)

Akissuteqaat

Siullermeernera

Naalakkersuisut sinnerlugin Jens Napaattoop, Naleraq, siunnersuutaanut qujarusuppunga. Nunatsinnit pisariaqanngitsumik aningaasat tammaannassannginnerat pillugu Naalakkersuisut siunnersuuteqartoq isumaqatigaat.

2030-mit Namminersorlutik Oqartussat 100 %-imik imminut sillimmasernissaannik siusinnerusutut inissitanik politikkimik aamma periusissiamik Naalakkersuisut nangitsisimapput. Imminut sillimmasiineq sillimmasiinerup assiginngilaa, tassaavorli siunissami annasarisinnaasanik taarsiisinnaaniarluni aningaasanik aalajangersimasunik immikkoortitsinermut aningaasatigut aqutsinissamut sakkuuvooq. Maannakkut sillimmasiiviusunit qulingiluanit Namminersorlutik Oqartussat tallimat missaanni imminut sillimmasigaapput, taamaattorli imminut sillimmasiineq taamaallaat aningaasaqarnermut eqorneqarfittut suliassaqarfinni mikinerusuniippoq. Nunatta Karsia artukkiiviginagu aningaasaqarnermik annasarisanik Namminersorlutik Oqartussat matussusiisinnaanissaat pillugu Naalakkersuisut anguniagaannik periusissiaq imaqrpoq.

Siunnersuuteqartup hunnorujut million kr.-t arlallit nunamit tammaannartartut oqaatigaa. Nunatsinni sillimmaserneqartunit sillimmasiinermi akiliut sillimmasiinermik ingerlatseqatigiiffinnut akiliutigineqartartut namminneq, imaluunniit taakku pigisaat ajoquserneqassappata nunatsinnit sillimmaserneqartut sillimmasiinermik ingerlatseqatigiiffinnit akiliutinik pissarsisarnerannik assingusutut nassataqartarnera tassunga atatillugu oqaatigissavara. Soorlu sapaatip akunnermi naanerata ingerlanerani namminersorlutik oqartussat illuutigisaanni erngup aqquaata innarlernera. Ajoquserneq ima annertutigaaq illuutigisaq maannakkut oorit millionilikkaat amerlasuut atorlugit tamakkiisumik iluarsanneqassalluni, imaluunniit sanaartugaqqissalluni. Taamaalinerani ukioq ataaseq tikillugu sulisut 100-t sinnerlugin allaffimmi inissaannut attartugaqartoqassaaq. Aningaasartuutit sillimmasiinerup akiligarai. Taamaalluni siunnersuuteqartup oqaatigisaanut ilanngaateqareerluni inernerisat koruuninut hunnorujut millionit arlalinngut naleqqiullugit appasinnerunissaannut naliliinissamut sutigut tamatigut tunngavissaqarpoq.

Sillimmasiinermut akiliutit sillimmasiissutaasup aamma sillimmasiissutitigut akiliutigineqartut aarlerinaateqarfiattut naliliisoqarnissaq siunertaralugu naatsorsorneqarput.

Nunatta sumiiffiini sillimmasiissutinik tuniniaassuteqarfilittut sillimmasiinermut ingerlatseqatigiiffinnik arlalinnik peqarpoq, tamakku ilaatigut nunatsinni sumiiffiusumut tunngavissiinissamik qulakteerinneqataallutik. Taamaattumik unammillerfimmi aamma niuffaffimmi nukiit atugaanerat, taamaalillutillu naapertuuttumik akinik inissiinermik qulakteerinerat naatsorsuutigisariaqarput.

Ajoqusissagunik sulisut taarsiissutinik ajunngitsorsiassanilluuniit pissarsisinnaatillugit nunatsinni sulisitsisut suliffimmi ajoquusernermut sillimmasiisummik akiliisarnissaat pillugit piumasaqaateqarnera eqqortuuvoq. Naalakkersuisut sulisut suliffimminni ajoqusissagunik aningaasaqarnikkut taarsiissuteqarnermik qularnaarinissaq pillugu sulisitsisunut piumasaqaateqartarneq naammaginartuusoq aamma pissusissamisoortoq isumaqarput.

Tassunga atatillugu Naalakkersuisut erseqqissassavaat, ajoraluartumik namminersortut ikitsuinnaat soorlu aalisartut, piniartut aamma savaatillit eqimattanut sillimmasiinermik aaqqiisummut tulluartumut atsiortarnerat. Aaqqiissut pillugu Sulisilluni Ajoqusernerit Pillugit Sullissiviup nittartagaani paasissutissat amerlanerit nassaarineqarsinnaapput.

Siunnersuuteqartoq ATP-mik eqqartuivoq. ATP-p suliassai ilaatigut inuuneq naallugu soraarnerussutisianik aaqqiissutinik aqutsinermut aamma akiliuteqarnermut tunngasuupput, ilaatigullu atugarissaarfimmi ikorsiissutinik arlalinnik aqutsineq, tamatumani ilanggullugit sulilluni ajoquusernermut sillimmasiissutit ilaapput. Inuuneq naallugu soraarnerussutisianik aaqqiissutinut akisussaaffilittut ATP aningaasanik imminnut akiliutigineqartunit piffissamut ungasissumut tunngasunik arlalinnut aningaasaliisarpoq, taamaalilluni soraarnerussutisianut sipaaruteqartut sapinngisamik annertunerpaamik iluanaaruteqartinniarlugit. Aningaasaliissutit sillimmasiinermut tunngasut soraarnerussutisinerup tunngasortaanut naleqqiullugu akiliisinnassuseq malunnartumik piffissamut sivikinnerusumut pippit.

Aningaasaatit taakku aamma siunertaannut naapertorlugit aqunneqartarnerat nalinginnarmik periusaasartoq ilisimatitsissutigissavara, aningaasaatit naleerukkiartornissaannut qularnaarinissamik, aammalu sillimmasetumut aningaasartuutinik tamakkiisunik annikillisaanissamik siunertaqarput. Aarlerinaammik annikillisaanissaq siunertalaralugu aningaasaliinernik assiginngisitaarisitsinissaannut sillimmasiinermut ingerlatsivinnut, aamma soraarnerussutisiassanut ingerlatseqatigiiffinnut aningaasaliinernut piumasaqaatinik tulluartunik arlalinnik atuuttoqarpoq. Tamatuma nassataraa nunatsinnit pigineqartutut sillimmasiinermik ingerlatseqatigiiffik sumiiffinni aningaasaliinernik amerlanernik taamaalertussatut kinguneqartariaqannginera.

Tamakku saniatigut siunnersuuteqartup sillimmasiinermik suliffeqarfimmit Royal Arctic Linep umiarsuaataanut innuussutissarsiorfimmut sillimmasiissutinit inunnut ajoquusernermut sillimmasiissutinik sunik tamanik neqerooruteqartartumik kissaateqarnera Naalakkersuisut taamaassasoq paasivaa. Sillimmasiissutinik siamasissumut tunngasunik sillimmasiinermik ingerlatseqatigiiffik neqerooruteqartussaq, kiisalu tunngaviusutut aningaasaatigisassanut piumasaqaatinik sakkortuunik malittarinnittussaq, aammalu sillimmasetuntut illersuisussaq

Naalakkersuisut isumaat malillugu sillimmasiissutinik unammillersinnaanngitsunik akigititanik nassataqartitsissaq. Taamaattumik nassuaassummik taama ittumik attuumassuteqartoqassanera Naalakkersuisut isumaqtigingilaat.

Naalakkersuisut naggiisullugu erseqqissassavaat, nunatsinni pisortat pingaarnertut pisortatigut qitiusumik suliassatik, soorlu isumaginninnermi aamma peqqinnissaqarfimmi imaluunniit ilinniartitaanermi, passunnerussagai. Taamaammat Naalakkersuisut Nunatta Karsimi aningaasat atorlugit namminersorlutik ingerlatsisunik, tamatumani sillimmasiisarfitt pioreertuni, unammilleqatigiinnissamut pisortatigut qitiusumik suliassarinagu isumaqarput.

Tamanna tunngavigalu, Naalakkersuisut sinnerlugit aalajangiiffigisassatut siunnersuutip itigartinneqarnissaa inassutigissavara.